

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i čl. 16. i 28. Pravilnika o licencama ("Službeni glasnik BiH", broj 38/05), Državna regulatorna komisija za električnu energiju, na sjednici održanoj 3. jula 2012. godine, donijela je

ODLUKU O IZDAVANJU LICENCE ZA DJELATNOST NEZAVISNOG OPERATORA SISTEMA

1. Izdaje se licenca "Nezavisnom operatoru sistema u Bosni i Hercegovini" Sarajevo za obavljanje djelatnosti nezavisnog operatora sistema.
2. Licenca iz tačke 1. ove odluke izdaje se za period od 12. jula 2012. godine do 11. jula 2019. godine.
3. Sastavni dio licence su Uvjeti za korištenje licence za obavljanje djelatnosti nezavisnog operatora sistema.
4. Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

Obrazloženje

"Nezavisni operator sistema u Bosni i Hercegovini" Sarajevo (u daljem tekstu: podnosilac zahtjeva), neprofitna kompanija uspostavljena Zakonom o osnivanju Nezavisnog operatora sistema za prijenosni sistem u Bosni i Hercegovini ("Službeni glasnik BiH", broj 35/04 - u daljem tekstu: Zakon o osnivanju NOS-a) sa funkcijama i ovlaštenjima utvrđenim čl. 2. i 7. istog zakona i članom 5.2. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11 - u daljem tekstu: Zakon o prijenosu) korisnik je licence za obavljanje djelatnosti nezavisnog operatora sistema, upisane u Registar licenci kod ove Komisije pod registracijskim brojem: 05-28-007-16/06 od 28. juna 2007. godine, čije trajanje ističe 11. jula 2012. godine.

Shodno članu 28. Pravilnika o licencama ("Službeni glasnik BiH", broj 38/05), ne kasnije od 180 dana prije isteka privremene licence, vlasnik licence je u obavezi podnijeti zahtjev za izdavanje nove licence. U ovom smislu je to učinio podnošenjem zahtjeva zaprimljenim pod brojem: 05-28-12-30/12 od 25. januara 2012. godine. O ovom zahtjevu odlučuje se u skladu sa internim pravilima i propisima DERK-a i shodno članu 7. Zakona o prijenosu.

Zahtjev je podnjet blagovremeno, na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnjeti uz zahtjev ili predočeni naknadno na zahtjev DERK-a, omogućili DERK-u da razumije, razmotri i odluči o podnjetom zahtjevu. U ovom smislu, u skladu sa članom 8. stav 2. Pravilnika o licencama, DERK je obavijestio podnosioca zahtjeva svojim aktom broj: 05-28-12-30-5/12 od 15. marta 2012. godine.

Po pregledu i provjeri svih dokumenata u pogledu njihovih formalnih elemenata, DERK je pristupio razmatranju zahtjeva. Najprije je u skladu sa obavezom iz člana 10. Pravilnika o licencama, 21. marta 2012. godine objavio u dnevnim novinama i na svojoj internet stranici obavijest za javnost sumirajući zahtjev za licencu i odredio rok do 5. aprila 2012. godine za dostavljanje komentara javnosti na podnjeti zahtjev za izdavanje licence i dostavljanje zahtjeva za stjecanje statusa umješača.

DERK konstatira da nisu dostavljani komentari u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješača.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja djelatnost nezavisnog operatora sistema. Njegove tehničke, pravne i finansijske mogućnosti permanentno su potvrđivane svih prethodnih godina u toku kojih je dokazivao da djelatnost nezavisnog operatora sistema obavlja u skladu sa Zakonom o prijenosu i Zakonom o osnivanju NOS-a, pridržavajući se važećih međunarodnih dokumenata koje su prihvatila nadležna tijela BiH, primjenjujući Tržišna pravila i Mrežni kodeks, tehničke i komercijalne standarde, odnoseći se prema učesnicima na tržištu na fer i nediskriminirajući način i nevršeći manipulacije tržištem električne energije, primjenjujući u transakcijama propisane procedure i tarife, te uredno plaćajući regulatornu naknadu.

Nadzor svih aspekata usklađenosti dosadašnjeg djelovanja podnosioca zahtjeva sa uvjetima korištenja licence, pružio je dokaze DERK-u da može pristupiti pripremi početne verzije Uvjeta za korištenje nove licence za obavljanje djelatnosti nezavisnog operatora sistema koja je od 16. maja 2012. godine učinjena dostupnom podnosiocu zahtjeva, kao i svim drugim zainteresiranim članovima javnosti, sa prilikom da svoje komentare iznesu i na općoj raspravi obavljenoj 23. maja 2012. godine u sjedištu DERK-a u Tuzli.

Podnosilac zahtjeva je iskoristio ovu priliku podnošenjem odgovarajućih sugestija, primjedbi, komentara i mišljenja, pod brojem 05-28-12-30-16/12 od 21. maja 2012. godine, kao doprinos daljem prilagođavanju prava i obaveza institucije nezavisnog operatora sistema u ispunjavanju njene uloge, funkcije i ovlaštenja u pogledu elektroprijenosnog sistema u BiH sa zahtjevima domaće i međunarodne elektroenergetske regulative i prakse.

Komentari podnosioca zahtjeva, o kojima je raspravljano i na pomenutoj općoj raspravi, u značajnoj su mjeri prihvaćeni u konačnoj verziji Uvjeta za obavljanje djelatnosti nezavisnog operatora sistema koja je sa prijedlogom da se zatražena licenca izda dostavljena podnosiocu zahtjeva aktom DERK-a, broj: 05-28-12-30-19/12 od 31. maja 2012. godine. U odsustvu novih komentara podnosioca u ostavljenom roku do 8. juna 2012. godine, bilo je osnovano zaključiti da prijedlog smatra sačinjenim u skladu sa pozitivnim zakonima i podzakonskim propisima Bosne i Hercegovine koji reguliraju predmetnu materiju.

Respektirajući izričitost odredbe člana 2. Zakona o osnivanju NOS-a da nakon osnivanja NOS-a, nijedna druga elektroenergetska, niti bilo koja druga kompanija, ni organ neće imati nadležnosti ni ovlaštenje u djelatnostima koje su ovim zakonom povjerene NOS-u, i nakon što su pregledom statusa primjene svih komponenti koje su odlučujuće za dodjelu licence dobijeni uvjerljivi pokazatelji da podnosilac zahtjeva ima osigurane resurse, organizirane uvjete i utvrđene profesionalne standarde da uspješno nastavi obavljati istu djelatnost, te na osnovu svega naprijed izloženog, odlučeno je kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-12-30-20/12

3. jula 2012. godine

Tuzla

Predsjedavajući Komisije

Milorad Tuševljak